

## ԺԱՅՈՒԱՊԱՏԿԵՐՆԵՐ ԳՈՇ ԳՅՈՒՂԻ ՇՐՋԱԿԱՅՔՈՒՄ


ԱՎԵՏՅԱՆ Վ. Վ.

Տավուշի մարզի Գոշ գյուղը հանրահայտ է ոչ միայն միջնադարյան Նոր Գետիկի կամ Գոշավանքի անգուգական պատմաճարտարապետական հուշարձան-համալիրով, ասեղնագործ հիշեցնող զարդարուն խաչքարերով, Մխիթար Գոշի դամբարանով, այլև բրոնզեդարյան հուշարձաններով:


Բրոնզեդարյան նյութերի մեջ կան անդրկովկասյան տիպի բրոնզե սակրը, ապարանջաններ և ուշ բրոնզեդարյան խեցեղենի նմուշներ, որոնք պահվում են Գոշավանքի ոչ մեծ թանգարանում: Դրանք այլ նյութերի հետ հայտնաբերվել են պատահաբար՝ գյուղի տարածքում շինարարական աշխատանքներ կատարելու ժամանակ: Առանձնապես կարևոր են նորահայտ ժայռապատկերները, որոնք հայտնաբերվել են 1985 թ. օգոստոսին, գյուղից 2,5 կմ հյուսիս-արևմուտք, Դիլանկի բլուր կոչվող վայրում:

Գտնված ժայռապատկերակիր քարերը չորսն են, որոնք ոռոգման աշխատանքների ժամանակ տեղահան են արվել և խառնիխուռն ընկած էին հողամասի միջնակներում կուտակված քարակույտերի մեջ: Դրանցից մեկն ունի 1,3 մ երկարություն, 1,1 մ հաստություն, որի 70 սմ լայնությամբ հարթ մակերեսին դրվագված է թանձր ստվերագծերով 10 պատկեր՝ երկու խմբով: Ձախակողմյան խմբում նկատելի են վայրի այծի և անտառային եղջերուի 6 պատկեր. հինգը՝ կանգնած, երկուսը՝ նստած վիճակում: Աջակողմյան խմբանկարն առնված է շրջանի մեջ, որով և առանձնանում է ձախակողմյան խմբից:

Շրջանի մեջ աչքի է ընկնում ձախ եզրին արված սեղանաձև՝ երկրաչափական բնույթի պատկերը, որի մակերեսով լայնակի տարված են հաստ, սեղանի կողերն իրար միացնող ակոսագծեր: Սեղանաձև պատկերի շուրջ կան կենդանիների՝ հավանաբար այծերի կամ եղջերուների հողմահարված, դժվար ընկալելի պատկերներ (նկ. 1):




Նկ. 1




Նկ. 2

Երկրորդ քարի վրա, որն ունի 35x40 սմ մակերես, պատկերված է գրեթե ամբողջ մարմնի երկարությամբ հետ գնացող եղջյուրներով այծ՝ արածելու կամ ջուր խմելու պահին (նկ. 2):



Նկ. 3



Նկ. 4

Երրորդ՝ նույն չափի քարին պատկերված է ուղիղ, վեր բարձրացող եղջյուրներով կենդանի, որին կարելի է նմանեցնել այծի կամ արու եղնիկի (նկ. 3):

Չորրորդ՝ դարձյալ նույն չափի քարի վրա պատկերված կենդանին հավանաբար ցուլ է, թվում է, թե առջևի ոտքերով, գուցե եղջյուրներով քանդում է գետինը. այդպես են վարվում ցլերը՝ վտանգի ժամանակ (նկ. 4):

Նշված ժայռապատկերները գտնվել են որոնողական աշխատանքների ժամանակ, սակայն տեղանքն ամբողջովին չի ուսումնասիրվել: Բացի ժայռապատկերներից, նույն տարածքում հայտնաբերվել է մի ընդարձակ, մոտ 1 հա տարածությամբ դամբարանադաշտ: Ցավոք, ոռոգման աշխատանքների ժամանակ տեղանքը հարթվել է, տեղ-տեղ երևում են դամբարանների ծածկերի սալաքարերը:

Դատելով դամբարանների հետքերից՝ դրանք գետնափոսային (հնափոսային) տիպի են. սրանց տարածքից հայտնաբերվել են գունազարդ խեցեղենի մանր բեկորներ:

Նշված դամբարանադաշտը և ժայռապատկերները, նախնական ուսումնասիրությունների հիման վրա, կարելի է թվագրել մ.թ.ա. II հազարամյակի սկզբներով՝ միջին բրոնզի դարով: Հարկ է նշել, որ Աղստևի հովտում կան մի շարք հին հուշարձաններ (մ.թ.ա. XVI - XII դդ.), որոնք առ այսօր ուսումնասիրված չեն: Այսպես, Կույբիշև գյուղից 1 կմ հարավ-արևելք, Աղստև գետի աջակողմյան՝ *Ալդրի հողեր* կոչվող վայրում, Դիլիջան քաղաքի աերացիոն կայանի շինարարության ժամանակ, հողային աշխատանքներ կատարելիս, 1982 թ. բացվել են դամբարաններ, որտեղ ստուգողական պեղումներ է կատարել Օնիկ Խնկիկյանը:

Մեր դիտումների ընթացքում նկատվեցին մի քանի անեղծ և կիսավեր դամբարաններ: Կիսավերներից մեկի ստորին շերտում հայտնաբերվեցին գունազարդ խեցեղենի նմուշներ: Դրանք երեք տարբեր անոթների բեկորներ էին, որոնցից մեկը դարչնակարմիր ներկով էր և սև մեղանով նախշազարդված, երկրորդի մուգ կարմիր հենքի վրա սև մեղանով արված էին երկու սվաստիկա, իսկ երրորդ՝ մուգ կարմիր փայլաներկով բեկորը պատված էր սև մեղանով արված պարույրներով:

Հայտնաբերվեց նաև ջարդված, բայց լրիվ պահպանված բեկորներով, խամրած կարմիր գույնի մեծ սափոր, որի վզի մասում կային վերից վար արված գծանախշեր: Սրանց հետ կային օքրայի մնացորդներ, մարդակմախքի բեկորներ և մոխիր:

Ալդրի հողերից հարավ, անտառապատ բլուրների վրա գտնվող հին գյուղատեղիում, որը հայտնի է Աչգեղատեղ անվամբ (տեղական բարբառով՝ աշուղի գյուղատեղ), կան միջնադարյան գերեզմաններ՝ առանց տապանագրերի, խաչքարեր և գետաքարով շարված կիսավեր եկեղեցի: Բնակարաններից մեկի ավերակներից տեղացիները գտել են բյուզանդական պղնձե ութ դրամ:

Գյուղատեղիում կան նաև հին դամբարաններ, որոնց հետքերը հազիվ են նշմարվում: Դրանցից մեկի ստուգողական պեղումների ժամանակ հայտնաբերվեցին գորշ և սև փայլաներկով խեցեղենի, բրուտագործական դուրգի վրա պատրաստված, մեծ քանակությամբ կայծքարի անմշակ բեկորներ, կենդանիների ոսկորների մնացորդներ, ձիու ատամներ: Դամբարանադաշտից տեղացիները գտել են լավ մշակված քարե երկու գունդ: Նշված հուշարձաններն առաջնահերթ ուսումնասիրման կարիք ունեն, քանի որ դրանք արդեն հետքակորույս են լինում:

Այսպիսով, պարզվում է, որ Գոշ գյուղի շրջակայքում կան ժայռապատկերներ, բրոնզեդարյան հուշարձաններ, իսկ Աղստև գետի հովտում՝ ինչպես բրոնզեդարյան, այնպես էլ միջնադարյան հուշարձաններ, որոնք տակավին ուսումնասիրված չեն:

## НАСКАЛЬНЫЕ ИЗОБРАЖЕНИЯ В ОКРЕСТНОСТЯХ С. ГОШ

АВЕТЯН В. В.

### Резюме

В Тавушской области РА, к северо-востоку от деревни Гош (2,5 км), на холме “Диланки” в 1985 г. были обнаружены наскальные изображения, которые схожи с ранее обнаруженными на территории Армении.

Среди них имеются изображения горных козлов, оленей, быков, а также трапециевидные геометрические знаки. Памятники бронзового и среднего веков на территории Гоша в долине реки Агстев по сей день не изучены.